

四庫全書

集部

欽定四庫全書

宋元詩會卷八十一

兵部主事陳焯撰

黃潛

字晉卿婺州義烏人母童氏夢大星墜懷而生潛  
潛成童能記經書迨長以文名四方中延祐二年  
進士授台州寧海丞遷兩浙都轉運鹽使改諸暨  
州判官入為應奉翰林文字同知制誥兼翰林國  
史院編修官轉國子博士出為江浙儒學提舉年  
六十七不俟引年納祿徑歸未幾詔起為翰林直  
學士知制誥同修國史兼經筵官陞侍講學士兼  
官如故自將仕郎七轉至中奉大夫謝政南還優

游田里凡七年卒于繡湖之私第年八十一追封  
江夏郡公謚文獻潛學問淹博約之于至精剖析  
經史疑難及古今制度名物多先儒所未發者文  
詞布置謹嚴援据確切及門受業者後多爲名儒  
所著日損齋  
藁三十餘卷

雜詩

三首

晨起步南園旭日朗以清葵花衆草中粲粲數丹榮流  
光非汝私獨爾心自傾覽物有深懷佇立方含情  
璞玉與寶劍淪落初未偶君看被煎被各在千年後將  
身比金石誰當獨長久悠悠百代下相知復何有

春風著萬物欣欣皆自私可憐兒女花榮悴更相持獨  
有澗底松偃蹇如不知何疑揚執戟草玄鬢若絲

效古

三首

上山見明月下山月相隨月豈知愛我我行自見之故  
山日已遠故人不可思殷勤謝明月願爾無時虧

落花隨風吹各自東西飛花飛既不息水流復何極同  
生不同歸能勿異顏色木生則有枝豹死則有皮悠悠  
岐路間多言亦奚為

飲酒莫盡醉盡醉無餘歡讀書莫弔古弔古多悲酸蕭  
艾蔽中野白露推芳蘭鳳饑不得死鳩泉食琅玕去去  
復去去采芝青雲端

連雨雜詩

二首

我思仇山人山川莽回互十書九不致木葉頻歲暮頗  
聞近移居併失夢中路得無挈妻兒倒載入山去  
今日曷不樂孤侶無與酬兀坐把書卷展玩不自休借  
問誰所為其人已千秋山雨政可聽撥書置牀頭

晚晴

洩雲散積雨林木含餘清披衣有奇懷偶從林叟行新  
晴遠峰麗夕陰孤花明曠日固所虞聊茲息營營

夜歸

空山四寥寥落日翳榛莽蜿蜒草中徑躡屨度寒雨楠  
杉窈深黑忽忽疑伏虎林窮澗水明稍聽歸人語

曉行湖上

曉行重湖上旭日青林半露霧寒未除鳬鷺靜初散黃

緣際餘景閃倏多遺玩會心乍有得撫已還成嘆夙子  
丹霞約久茲芳洲畔獨往願易違離居歲方換沙暄芷  
芽動春遶川華亂存期乃寂寞取適豈爛熳小隱倘見  
招漁樵共昏旦

寄方子踐子發

窮居悵無遂徂歲聿載陰飛翹隕芳華候蟲厲哀音急  
颼扇叢薄泣露栖喬林撫景慨往古端操思繼今折蘭  
合幽佩解纓濯清潯石林窅蔥蒨佳柏鬱蕭森遺世豈

余敢匡時非我任  
覽已謝高軌即事  
念所欽纏綿阻道  
里緬邈眺岡岑委  
懷竚芳訊貽好在  
規箴

東園晚歸

渙忍嬰近務超遙  
愛佳辰興言望東  
菑良菑藹津津鄙  
人昧時趨曠途夙  
所遵幸遠簪組累  
稍欣田園隣兀兀  
登故畦悠悠睇城  
闌理穢出新竹撼  
枯落荆薪夕日逗  
遠川餘暉散衣巾  
疊疊觀物變依依  
念農人渠渠長者  
言惻惻非賤貧



贈葉審言別

昔人稱好士乃有黃金臺黃金亦何物顧用驕賢才  
君被短褐志力何雄哉北走叫閭闔紅雲拍崔嵬終然  
無苟售自保同嬰孩車服非吾榮黃金真浮埃十年今  
何官茅屋歌蒼苔豈無琅玕樹鳳飛故低徊一朝脫身  
去歛觀雲路開葉君善自愛往矣無嫌猜迷邦古所誚  
豈弟貴不回願言吐奇胸落落排風雷尚念窮賤者衡  
門守蒿萊

休日集於城南

投耒從遠遊，牽世乖明略。豈不畏簡書，未能置丘壑。崇岡近盤互，春物紛照灼。休沐集諸彥，迂趾惠前諾。稍空林中尊，復詠霞上作。迢迢歷墟壠，靡靡瞰城郭。脩楊蔭晴渚，野櫻散朱萼。撫時悼推斥，畢景顧棲託。損益向子明，才能賈生薄。滕言觀歲寒，無將媿塲藿。

曉望

城頭鴉鳴曙，起坐理冠幘。開窗寫遙望，烟霧竟川澤。喧

喧市聲動漠漠井氣白如何山中人歲暮塵埃客

龍灣夜泊

乘潮出遠浦日暮北風平高亭不可望遙遙笳鼓聲月  
明寒雁下江空夕烟生非關川途念沈憂坐自盈

秋夜觀書作

閒居感時駛獨學難為功眷言思古人幽懷極忡忡秉  
燭起中夜攬卷來清風恭惟千載心皎潔縣無窮泥俗  
自升降道妙非汙隆後來亦奚為黑白紛相攻華芳乍

可悅軌轍何由通吾將離言說庶以觀其同所憂名為  
累不懼蓄不豐開軒視明河白月當天中怡然掩書坐  
夜氣方鴻蒙

登錢山望菰城慨然而賦

吳興水為州諸山若浮萍況此一培塿瑣屑世未明所  
欣漁樵居乃與緇錫并種竹有萬竿結茅無十楹老僧  
解人意蹤履能相迎芳草被行逕朱藤暗巖扃蕭條空  
堦暮日照莓苔青猶嫌所歷卑未極遊眺情聳身白雲

上始見春申城想當高會時樓觀飛青冥竭海薦壘勺  
窮山羞鼎錙安知千載後寂寞無人行煌煌冠蓋區壤  
壤狐兔瑩歸來朱門客聽此松風聲

靈源

偶為山中遊遠過雲關宿蒼燈閃初夜雨氣蒸深屋時  
聞清梵音窈窕松林曲

草堂

迢迢上方界水木翳清景山深不可留日暮衣裳冷淒

其懷昔遊百歲嗟俄頃

鹿田

披榛度空荒突兀崖寺古幽花雜紅白老屋亞雲雨前  
瞻石徑微咫尺不得取

寶峯

下山復上山躡僑行沮洳宿雲冒長嶺旭日暎高樹山  
僧亦何為獨向城闌去

山橋

行行指木末路逐飛雲上時登巨石憩共聽春泉響尋源竟莫窮即事成幽賞

寶石

暮投招提境明發首歸路舉頭望山椒遙認經行處重  
重巖壑間蒼然正烟霧

赤城

雞鳴秣吾馬晚飯山中行何以慰旅懷赤城有嘉名灘  
長石齒齒樹細風泠泠時見巖壁間粲若丹砂明溫泉

發其陽撫訶勤百靈前峰指金閣真境標殊庭白道人  
跡稀青崖雲氣生信美無少留緬焉起深情

擔子窪

自從始出關數日走崖谷迢迢度偏嶺險盡得平陸坡  
陀皆土山高下紛起伏連天暗豐草不復見林木行人  
烟際來牛羊雨中牧颯然衣裳單咫尺異寒燠佇立方  
有懷相逢仍問俗畏途宜疾驅更傍灣河宿

遊寶陀寺



十年望滄海臨流不能渡蒼茫歲華晚邂逅舟楫具拂  
衣乘天風挂席隨烟霧旦從蛟門發暝指翁洲住前瞻  
積水深島嶼青無數梅岑特孤絕遙見日出處寄身人  
境外矯首禪關路粲粲金砂石離離白花樹高期愜幽  
抱歷覽增遐慕嗒然坐忘言目送寒潮去

雪竇紀遊

三首

移舟泊泉口我行已信宿天寒洲渚生峰迴川途曲烟  
霞罩蘭若別墅在林麓

高人欣相迎山門帶流水風生珠樹間月窺鏡池裏觸  
景遂成迷應接殊未已

興移初出山繫纜長汀樹夜來雪已深溪風愈難度猶  
疑鐘磬音遙遙白雲處

同王章甫待制校文上京八月十五夜宿龍門驛  
涼風墮黃榆萬馬皆南馳而我方北首度關及鳴雞驛  
路更幽阻僕夫慘不怡徐驅待明發決滯窮烟霏貂裘  
者誰子怪我縫掖衣為言霜露多遑遑獨安之我非不

自愛簡書今有期憶昔州縣間折腰向小兒荏苒二十  
年白首初登基同袍如燕鴻去住恒相違悠然慨平生  
與世何參差暝投龍門驛高館臨迴溪青崖拱白月水  
木含餘輝秋色故瀟灑我行殊未遲相從況魁彥炯若  
珊瑚枝衰暮奚足云一觴聊共持

送鄭以道

鄭君不羈客漫仕常優游故人滿天上獨佐嶺南州嶺  
南風土異去天將萬里驛騎如流星衆手挽不止到官

定多暇坐對梅花時溪石秀可硯泚筆成新詩詩成付  
迴雁動是春冬隔用儒行召君努力崇明德

歲晏

歲晏木葉落遙見東城隅雉堞鬱岩堯列屋何蕭疎悠  
悠西南望赫赫金張廬退朝集冠蓋鳴珂沸通衢合還  
多俊遊並轡飛華裾顧盼有光彩行者為踟躕俯慙筋  
力微無從效馳驅日斜坐官舍還拂案上書緬彼川路  
長感此年運徂遲迴不能去嘆息將焉如

送王鍊師歸四明

飄飄采真侶乃在四明山霞裾朝帝所瓊館留人間忽  
聞雙鳬舄却向東南還望之若流星邈然不可攀海月  
炤堦祀天風飛佩環我何苦羈旅冰雪生朱顏

陽山昱上人訪予吳門寓舍求為湘竹詩予辭以  
未見竹上人不遠六十里自山中舁其竹而來  
好事有如此者欣然為賦長句

道人來自陽山麓手携舊種千竿竹小栽方斛不盈尺

中有瀟湘江一曲未信天工能爾奇不知地脈從誰縮  
晴窗脩脩散烟霧眼底森然立羣玉豈期我乃累此君  
蒙犯風埃走塵俗故山方遠重愁絕新句未成慙迫促  
黃岡之產大中椽政用材美剝其腹願言保此終天年  
歲暮山中伴幽獨

題李氏白石山房

名山秀出鄱江曲上有立石如立玉尚書履聲忽已遠  
隱者新居在盤谷花開鳥鳴春晝永白雲重重養喬木

夫君亦復稱其家有書能藏且能讀露鈔雪纂久愈富  
何膏鄴侯三萬軸山靈翕霍謹呵護夜半虹光發深屋  
引泉天井助芳潤大勝吳儂飲山渌我欲從之不可到  
細字長書俄滿幅毫分縷析極根柢大義森然見條目  
鄙人媿莫知所對叩請安得留更僕頗聞石洞闕遺音  
龍門餘韻煩君續臨風傾詠寄綢繆哀朽終期挹膏馥

題張清夫心遠堂

吾聞古來賢達士不擇山林與朝市百年塵甕兩醞雞

鵬鷗逍遙俱可爾夫君平生瀟灑意俯睨軒裳猶敝屣  
翩然一舸鱸魚鄉歸來不待秋風起忘言兀兀坐終日  
天地古今齊一指但見山高湖水深青螺蕩漾銀盃裏  
柴桑之人去我久風味何妨略相似神交冥漠雲海長  
目送歸鴻渺千里

題醉歌圖

翰林主人天上来布帆不為鱸魚開江湖渺渺天一色  
朝光暮靄相徘徊昔賢心賞餘勝處祇有水竹無亭臺



碑材久已沒荆棘  
發齒不復留莓苔  
後來視今猶視昔  
今我不樂胡為哉  
太官馬漣遠莫致  
隣翁綠蟻浮新醅  
欣然一飲便終夕  
鼻端氣息如雲雷  
是間別有一天地  
不知何處為蓬萊  
迴觀方內海一粟  
醯雞塵甕何喧豗  
黃冠祕監太狂態  
騎鯨供奉非仙才  
揮毫政要真學士  
鋒車流水行相催  
瑤池曲宴多雨露  
歸歟酌彼黃金壘

桃巖

立石平如削飛雲近可梯  
莫窮千古勝但惜衆山低  
靈

草經年長珍禽隔樹啼人言舊朝士感事有留題

雨

兀坐九十日雨聲殊未收花時翻益睡茅屋不禁愁生  
事吾何望春寒晚故留江波青滿眼萬里付雙鷗

寄友人

憐君山水意局促守柴扉故里悲秋草涼風滿褐衣滄  
洲斜日晚白社幾人歸寂寞分遙念天寒木葉稀

秋懷 二首

稍稍秋河落娟娟宿露微天清江不息野迴樹相依  
回首狂歌數驚心昨夢非流螢無思極巧入絳帷飛

風雨仍搖落江山且滯留  
懶從生事拙閒惜壯心休  
弱蔓紫欹石空槎卧  
汨流典懷到微物世故劇悠悠

憑軒

信有儒冠誤憑軒意欲迷  
山深風雨惡天濶羽毛低  
化日開炎瘴連城送鼓輦  
荷父吾媿爾未敢嘆塗泥

風雨

風雨忽如此閉門方晝眠故應為計拙可復要人憐燈  
火羌村路桑麻杜曲田悠悠今視昔把卷一茫然

山中懷友

卓犖恒山秀相逢幾抱琴五年風雨別四海弟兄心雪  
外梅花遠山中桂樹深定知嵇叔夜高興薄雲林

聞子踐卧疾

吾子乃多病何人共解顏水聲和藥臼春色閉松關積  
雨連三月懷人劇萬山同遊況零落浩蕩可追攀

八詠樓

懷古荒碑在登樓晚望賒秋陰垂野薄江勢抱城斜  
地悲遊子冰霜感歲華紅塵吹短褐歸興及清笳

送陳養直歸四明

迢迢淞河水同渡不同歸執袂方成別驚帆已若飛  
野橋行處酒風雪去時衣瞻望嗟何及天長鴻雁微

送馬伯忱教授

卓聲青雲彥飛騰及妙年書成天祿閣座有廣文氈  
九

陌車塵外千軍筆陣前  
白頭慚倚席臨別思茫然

題石門淨勝寺

十頃蒼陂上山迴  
地勢偏屋栖黃面  
老碑挂赤烏年葉  
葉風荷顫層層雪  
瀑縣青燈夜寥閒  
獨照一僧禪

感舊

華屋山丘不可期  
峴峰依舊綠參差  
空懷下榻延徐孺  
無復乘舟訪戴逵  
日暮更聞隣舍笛  
歲寒惟有角弓詩  
舊遊寂寞成今古  
冷石秋花處處悲

早起

漠漠晴簷散薄雲，獨搔華髮立清晨。  
春風入樹無行迹，晚月窺簾欲近人。  
旋覺新吟隨夢寐，不知清霧濕衣巾。  
何人正踏長安陌，想見看花拂面塵。

獨立

數盡飛花一愴然，壯心迢遞夕雲邊。  
十年人事空流水，二月風光已杜鵑。  
過眼青春寧復得，污人黃土絕堪憐。  
故園尚有平生約，可使蒼苔到石田。

寄友人

繫舸一別雲水鄉  
暮川葭莢空蒼蒼  
漳濱卧病他年憶  
渭北題詩春日長  
蕪菁作花已爛熳  
楊柳飛絮若顛狂  
聞道茯苓久堪劊  
遲子青鞋經澗岡

夏日漫書

枕上初殘柏子香  
鳥聲簾外已斜陽  
碧山過雨晴逾好  
綠樹無風晚自涼  
芳歲背人成荏苒  
好詩和夢落蒼茫  
羊求何不來三徑  
門掩殘書滿石牀



逢葉伯幾

水烟沙雨送歸航  
楓葉蘆花已十霜  
瑤曲天香春夢遠  
墨池秋草故遊荒  
碧峰又是新迴雁  
白石依然舊化羊  
一笑相逢却成別  
暮雲千里思茫茫

答友人

芝掌峰前一杯酒  
別離歲晚遞相望  
野梅如雪遙入眼  
曉雁連天寒叫霜  
閉門窮巷燈火冷  
回首蒼山雲樹長  
幾時抱被却同宿  
愧爾詩筒遠送將

過烏傷墓

丹青像設始何年  
翁仲遺墟自古傳  
時有北人來下馬  
不知秦樹幾啼鵑  
牧童解指看碑路  
野衲分耕祭墓田  
回首長安西日外  
茂陵松柏正蒼烟

金陵天津橋

五雲零落渺天涯  
陳迹蒼茫日自斜  
畫角已吹邊塞曲  
紅蘭新長內園花  
可憐遺老埋黃壤  
曾倚春風望翠華  
好在北山猿與鶴  
依然同住舊烟霞

送人歸豫章

已覺栖遲懶曳裾可能為我強躊躇  
一帆秋色紅塵外千里江關白雁初  
建業水清誰共飲潯陽潮斷定無書  
黃金未盡朱顏在莫種桃花學隱居

余山

春雲牢落雁無聲沙岼參差石有稜  
雙屐漫窮芳草逕一龕長愧白頭僧  
晴濤閃閃翻孤日山木昏昏卷翠藤  
後夜清風滿遙念夢遊空指上方燈

遣興

青雲如夢慨平生白髮驚春忽數莖  
漸覺交遊隨日別強知顏色逐人行  
百年松檟誰能去五畝烟霞故可耕  
妄念掃除渾欲盡少游何得尚相輕

客樓雨中

江城飄泊動經年盡日高樓閱過船  
睡起小窻初聽雨岸傍垂柳已生烟  
坐拋歲月今如此每望雲山欲泫然  
尚喜遊從得諸彥時將樂事寄新篇

次韻答蔣春卿

不謂紅塵拂面時，軒然談笑一舒眉。  
晴風石鼎浮花乳，夜雨春盤冷碧絲。  
握手遽成三宿戀，論心那覺十年遲。  
酒船漁網歸無計，未必山前白鷺知。

花信

已覺尋芳去較遲，千林紅紫想紛披。  
幾經夜雨能無恙，試問春風竟不知。  
斜日遊蜂應有夢，野亭立馬已多時。  
殷勤却是江南客，曾擘冰霜寄一枝。

送貢教授致仕歸里

宦情鄉思兩依依  
獨裹寒氊去若飛  
歲晏忍為千里別  
林間驚見一人歸  
官河遶樹迎山榭  
夕日暄風颺綵衣  
漫使臨歧生悵望  
可容泉石借餘輝

陳山晚泊

一柱孤撐杳靄間  
人言此是客星山  
流風百世今誰嗣  
應詔諸生故未還  
荒塚草深迂石路  
高齋月滿闕松關  
窮年漫迹滄江上  
及此維舟獨厚顏

上巖寺訪一公

晚色微茫尚帶星脩蹊聲確斷人行獨支瘦竹身猶健  
高入重雲地忽平落月正當山缺處細泉頻作雨來聲  
上方燈火青林曲隱隱疎鐘一再鳴

題東柯谷圖

長松密竹翠交加洞府新開碧海涯石上仙人留足跡  
春深澗水出桃花流傳圖畫來千里生長兒孫只一家  
目斷飛鴻那可到舊遊空指赤城霞

題雪竇妙高樓

偶為清遊宿梵宮，凌晨試上最高峰。  
水翻雪色寒猶落，雲掩丹光遠更重。  
舊有一僧能跨虎，近聞三洞盡藏龍。  
下方車馬應難到，烟際唯聽日暮鐘。

送趙繼清潮州推官

相國南遷有故居，理官高選出新除。  
承恩特與金魚袋，訪舊爭迎駟馬車。  
春入園扉庭草暗，天低驛路嶺梅疎。  
鳳池不隔同年面，歸及梅花雁影初。



送孔御史歸曲阜

清流共喜聚羣賢  
新渥時聞下九天  
東觀綉書何日了  
中丞遺笏要人傳  
過家莫久依林廟  
封事先須徹御筵  
千載斯文寄來哲  
臨分握手重縣縣

送龍南歐陽縣尹

絲綸閣下半同袍  
獨上南船去莫招  
出宰不嫌官俸薄  
過家那覺驛程遙  
長溪白石晴雷轉  
深洞黃茅毒霧消  
想見行春有佳句  
坐令遐俗變風謠

送尉彥誠道州經歷

一別垂垂四十年朔風吹鬢兩蒼然寒氊久坐歸何日  
上幕初登望若仙莫使催科書下考盛談名理繼前賢  
春生馬首逢迴雁併寫相思入近篇

送陳季和

高齋燈火正蕭條忽遡天風上沈寥共喜彈冠如貢禹  
豈期投筆學班超時清桴鼓元無用歲晚弓旌倘見招  
雪後江南春水活重來休厭驛程遙

次韻蘇侍郎平村暮歸

中臺多暇獨儀曹  
退食歸來路不遙  
扶老未須蒼玉杖  
行春聊過赤闌橋  
揮毫風雨傾三峽  
聽履星辰接九霄  
媿我白頭方倚席  
敢將巴曲和仙韶

題莫氏山莊圖

旋移小隱傍南峯  
遠有咸平處士風  
山態近人猶偃蹇  
湖光無雨亦空濛  
行春杖履時時到  
臨水軒窗面面通  
別作新亭供戲劇  
青帘搖曳杏花中

鳳凰山

滄海桑田事渺茫  
行看遺老色荒涼  
為言故國遊麋鹿  
漫指空山號鳳凰  
春盡綠莎迷輦道  
雨多蒼蘚上官牆  
遙知江水東流畔  
更有平蕪與夕陽

九日登石頭城

背郭囂塵遠  
高秋川岳清  
幽懷初曠蕩  
陳迹故縱橫  
遙望龍盤舊  
長憐蟻穴爭  
紺園隨處闢  
粉堞向來傾  
撥草窺智井  
看碑驗故塋  
門開蒼耳路  
亭愛翠微名  
遠樹淮

南出滄江鳥外明  
人烟川浩渺風物歲崢嶸  
吹帽仍佳節傳觴但老兵  
登高未成賦覽古獨含情  
政復哀王粲何堪厭襮衡  
敝廬滄海曲目斷白雲生

積觀賦絕句

三首

芙蓉峰下南朝寺  
水秀山明兩絕奇  
更向水窮山盡處  
一庵高貯碧雲師

山中今是太平民  
尚與人間隔幾塵  
流水桃花三百曲  
莫教重誤武陵人

坐愛春泉響翠微  
玉花吹濕薜蘿衣  
何人為擘冰壺破  
共看青天白練飛

水仙圖

脩脩翠羽映鳴璫  
誰遣乘風過我傍  
歲晏高堂空四壁  
一簾烟雨夢瀟湘

山水圖

老樹無陰石有稜  
亂山高下白雲層  
夢中猶識江南路  
惟恨舟人喚不應

柳貫

字道傳浦陽人器局凝定嘗受性理之學于金履祥期以實踐躬行自幼至老好學不倦凡六經百氏星歷術數及釋老異教之書靡所弗通作文沉鬱春容涵肆演迤人多傳誦之始用察舉為江山縣儒學教諭仕至翰林待制所著文集四十卷字系近思錄廣輯金石竹帛遺文共十五卷與黃潛齋名曰黃柳又合虞揭稱之曰四傑

度居庸關

居庸朔方塞始入兩崖張行行轉石角細路縈澗岡層壑倒天影半林漏晨光崎嶇里四十所歷萬羊腸千轅

絡前後兩軌通中央谷開稍夷曠在險獲康莊豈惟遂  
生聚列屢參雁行激流或礮磴架广亦僧坊我生山水  
窟愛此不能忘是日新雨已浮嵐亂沾裳水聲與石鬪  
風飄韻清商跼轡不知高浮雲翼起驤考牒曩有聞經  
途今始詳緬惟古塞北八州猶漢疆控扼識形勢會同  
知樂康屬茲景運開六服連綏荒兩京備巡幸離宮及  
相望守岳將孝制如祠匪求祥式瞻虎氣騰足徵大業  
昌遠想王會圖勿賡祈招章



李老谷聞子規

老杜聞子規近在東西川猶云感時物收淚寫幽悵今  
我行塞徼子規相後先時夏雲景晦鳥呼搖空烟響入  
樹窅窅啼垂血濺濺想知岐路難不恤軀命全千聲復  
萬聲喚我歸言遄苟非木石心豈免腸內煎江南叢薄  
間有花名杜鵑開時是鳥至相戒治春田不歸如江水  
負此今五年風土孰云異物情要有遷寄巢勿浪出祝  
爾還自憐嚴程趣行邁且復揮吾鞭

和袁集賢上都雜詩 八首

雨水漸衣黑雲沙際目黃烟開才黯澹日出已蒼涼徇  
俗高簷帽清心小篆香端居萬里念蕙草惜微芳

昔建寰中業初開徼外山睢城平兀兀沙水淨灣灣朱  
夏宸游正清秋武衛閒叨陪文學乘空愧鬢毛斑

徭俗隨方異溝途隔舍迷醺人惟馬湏勸客有駝蹄殿  
角孤花靚城隅雜樹低天涯中夜舞如意昔曾攜

天潢猶白白雲幙故青青積潦摧車軸高風墮箭翎宮

塗丹楮聖殿戶紫金釘女樂蓬萊祕哀簫動杳冥

幄殿層雲障轅門積雪峰奇鷹皆戴角御馬盡飛龍瀚  
海將臨幸云亭望陟封青丘大羽獵有事待玄冬

曹務唯章句官規自法程齋扉侵雨潤宴几得風清歷  
歷三刀夢行行萬里城明年遂耕隱深仗酒為名

公子青絲轡王孫綠幘車宴酣風小定舞破日西斜手  
擲宮中果神行海上槎築鄩無自厚儉德不期奢

水草方方善弓弧戶戶便合圍連婦女從戍到曾玄雪

毳千家帳冰瓢百眼泉浚稽山更北長望斗光縣

觀實喇鄂爾多御宴回

毳幙承空枉繡楣綵繩亘地掣文霓  
宸旗忽動祠光下  
甲帳徐開殿影齊  
芍藥名花圍簇坐  
蒲萄法酒拆封泥  
御前賜醕千官醉  
思覺中天雨露低

元日宴大安閣

金殿開扉日映樞翠帷香霧動流蘇  
玉壺脩幹雙龍捧  
寶座重裯瑞鵲敷  
春色入杯初潑灑  
雪先浮檻尚模糊

天元啟運三陽正  
需宴欣承湛露濡

還次桓州

塞雨初乾草木霜  
穹廬秋色滿沙場  
割鮮俎上薦黃鼠  
獵獲腰間縣白狼  
別部烏桓知幾族  
他山穡落是何方  
長雲西北天如水  
想見旌旗瀚海光

題齋壁

牧馬新來秣地椒  
衛頭桐酒玉傾瓢  
羲和白日經天近  
勅勒陰山度漠遙  
雨過忽然思御袂  
風清聊復快凌歊

他年續作灤陽夢萬里排雲遡寂寥

送臨川謝有源赴閩醫提領

一路青山荔子叢華山西望粵臺東家風蘭玉庭階上  
官事侵苓藥籠中鷁首去乘潮浪白螭房催薦酒醅紅  
福州自是炎蒸少臘雪飛花落半空

張養浩

字希孟濟南人年方十歲讀書不輟父母止之則  
默誦竊讀稍長肆力益勤山東按察使薦為學正  
遊京師獻書平章布呼密大奇之辟為令史選受  
棠邑縣尹多惠政召授東宮文學拜監察御史以

言事忤僧格變姓名遁去尚書省罷召起右司都事遷翰林直學士祕書少監歷禮部侍郎尚書至參議中書省事諫止英宗張燈內廷尤人所不敢言者丁父憂屢召弗起天歷二年關中大旱特授陝西行省中丞聞命登車經華山禱雨痛哭不能起忽大雨二日到官四月以賑荒積勞得疾卒年六十秦人哀之如失父母追封濱國公諡文忠

休日郊外

久厭官居苦幽尋到澗阿鶴知松歲月鷗狎海風波野迴塔孤立嶺高雲半過菟裘良未暇聊此慰蹉跎

山行

一嬾將成性春遊尚爾勤  
花鼓知雨力水皺見風文  
碧落一明月青山半白雲  
却愁從此去塵冗又紛紛

齋居春暮

漂泊東君底處家落紅風捲赤城霞  
半窻春夢子規月滿院客愁楊柳花  
世事悠悠惟欠酒棠陰密密欲藏鴉  
韶光九十須臾頃不是劉郎鬢易華

酌突泉

繞欄驚視重徘徊流水緣何自起堆  
三尺不消平地雪



四時常吼半空雷  
深通滄海愁波盡  
怒撼秋風恐岸摧  
每過塵懷為瀟灑  
斜陽欲沒未能回

王執謙

字六皆濟南人與張養浩李京輩稱詩家四傑

孟光舉案圖

白髮梁鴻與世乖  
賴逢光也配其才  
五噫歌罷愁無奈  
不覺春從案上來

李京

字景山河間人與王執謙張養浩  
田衍唱和士林美之稱爲神人

留別都城諸公

蒼龍雙闕鬱岧峣曾侍鵷鸞趣早朝往事已隨塵滾滾  
虛名贏得鬢蕭蕭長林豐草空相憶瘴雨蠻烟苦見招  
借問都門門外柳爲誰留著最長條



宋元詩會卷八十一

欽定四庫全書

集部

宋元詩會卷八十二

詳校官中書臣陸 湘

主事銜臣徐以坤覆勘

總校官知縣臣繆 琪

校對官中書臣田尹衡

謄錄監生臣金拱闔

欽定四庫全書

宋元詩會卷八十二

兵部主事陳焯編

朱德潤

字澤民睢水人工詩畫延祐間用趙孟頫薦得入仕籍宦弗稱志遂挂冠歸年七十二卒有存復齋稿虞集為跋曰澤民文章典雅而理致甚明獨惜以繪事掩其所長然識者不厭其多能也二子復吉中吉於明初官典籍給事家藏有睢陽五老圖乃其九世祖兵部郎中朱會與杜祁公輩稱五老也者

送馮海粟待制入京

人生百年間會面能幾何昔年別君去冰雪滿長河今  
歲復送君堤柳青婆婆春塘漾輕舸曉日生微波柔櫓  
數聲動遊子行不歌夢隨征帆杳思逐春流多落花粘  
空樽錯落金巨羅聚散未足道且使朱顏酡

次韻貢仲章學士題仙山圖

浮生三十餘失志墮塵鞅南吳與北燕所歷如翻掌山  
中猿鶴期別路成榛莽瑶草霜未凋靈芝日應長久聞

東王公御氣九霄上  
縹緲星霞裾虛室絕華想  
欲從道無因寫此寄清曠

泛太湖訪友

扁舟去何所渺渺太湖陰  
依依桑梓村拍拍枕寒潯  
飛雲入遐睇鳥道橫青岑  
篙師戒勿渡柔櫓力不任  
我身雖骨立未肯折壯心  
放船當中流浩歌激清音  
何當被宮錦再作峨嵋吟

和柯敬仲博士幽蘭

陽和徧巖谷，猗蘭發初芳。幽姿不自媚，隨風忽飄香。寧辭雨露恩，感此歲月長。願隨郎官握，得上中書堂。不慚山澤姿，高貴比金張。靈芝在宣室，豈獨懷沅湘。

題唐明皇幸驪山圖

驪山西北高萬乘，東南至霓旌。蒼翠中閣道，丹青內憶昔。上林遊春寒多，並轡羯鼓召花奴。黃門催力士，霓裳曲未終。驚動漁陽騎。

題張參政所藏太真上馬圖



開元朝野時清明姚宋廟謀多輔成紫宸前殿焚錦繡  
花萼樓高延弟兄那知暇豫生淫樂慢舞霓裳羽衣薄  
龍漿流禍入宮牆野鹿銜花汙簾箔春晴並轡曲江行  
回顧阿環嬌態生繡衣珠玑如花旋秦號椒房恩寵鮮  
宮中昇出錦棚兒兵滿漁陽人未知一朝犯順入宮闕  
咸陽煙塵迷日月翠華雜沓驚塵蒙劍閣西迴渭水中  
王臣下微同列國從此藩鎮爭豪雄人生富貴真迷途  
傾城褒姒無時無漫道玄宗不知政試問當年無逸圖

仙山圖為趙彥昭賦

崆峒之山戴斗極疊嶂橫陳開碣石翠崖丹磴互低昂  
複閣層欄轉空碧碧桃花落笙聲幽雙成吹玉彩鳳謳  
跨鳳騰雲去無迹清猿啼斷層崖秋霞光隱映山長在  
寰海茫茫隔烟靄舊遊仙侶謾招呼誤落人間幾千載  
吳爭越戰何可數束書欲問桃源路畫圖空見避秦人  
隔水漁郎不相顧

送李益齊之臨洮

綠陰滿京畿送子之臨洮臨洮何茫茫流出長城濠長  
城岸阻玉關阨于闐蔥嶺河涼高羌氏兒郎走帶箭哀  
笳風起斗擊刁良人西征二三載寶幢車馬聲塵遙如  
今不用酒泉郡宣必坐使朱顏凋蒲萄苜蓿味雖美異  
方土俗殊鄉里避地猶當似管寧受封應得論箕子願  
從列騎擁旌旄歸來燕處華堂裏却話人情翻掌難曾  
浥征袍淚如洗

讀隋書

廣通渠邊渭水流  
長安猛將縣兜牟  
陳郎酣睡未知曉  
采石夜渡江聲秋  
韓擒不待賀若報  
呼得蠻丁作鄉導  
銅鉦一聲歌管闌  
望仙閣下旌旗繞  
兵家兒女髮照人  
金井梧桐三墜身  
血痕已汙青溪草  
遺恨空憐高使君  
當時只道明良會  
三十年間轉頭事  
江都未放錦帆回  
晉陽城內驚塵起

德政碑

德政碑路旁立石高  
巍巍傳是邑中賢  
令尹三年秩滿

人頌之刻石道傍紀德政傍人見者或歛歛借問歛歛者誰子云是西家鐫石兒去年官差鐫此石官司督工限十日上戶歛錢支半工每年準備遭驅責城中書生無學俸但得錢多好作頌豈知令尹賢不賢且喜豪民來饋送德政碑磨不去勸君改作橋梁柱乞與行人濟不通免令觀者嗟何補

水深圍

水深圍田疇蕩蕩如湖陂圍低水深岸不立雖有木石

將何施里中申官官不允徵糧每歲歸倉廩稻梁無種  
長菰蒲民產賠償官始准今春水澇忽無津十分災作  
五分申問渠何故作此弊府州覆熟成三分吏胥入鄉  
日旁午二分徵作賠官賦倘逢人訴熟為荒破盡家資  
猶不補因此年年怕官惱水渰水深俱不報東南民力  
日漸窮不願為農願為盜人生盜賊豈願為天生衣食  
官迫之水渰償米或時稔賠糧無奈水深圍

題石崇錦障圖

洛陽金谷園中花雕玉為欄繡作遮琉璃器多出珍饌  
瑪瑙街長行細車椒房塗香貯歌舞曳珠珥翠籠輕紗  
珊瑚扶疎三四尺王羊貴戚爭豪奢那知花淫風雨妬  
古來山澤生龍蛇嬋娟墜樓寶玦碎月明夜半啼驚鴉

除日

日行三百六十五今夕方除歲云暮人生憂樂百年期  
又見日除當此度養和適情宜及時古今中壽七十稀  
自非金石不可永刀圭誰保長生期彭宣老聃亦何之

不須更作送窮詩客聞此詞莫傷客樽前且醉黃金卮  
觀內廐洗馬

黃雲灑雨沙場秋灘高水平凝不流曉霜襲透蒼駝裘  
圉人浴馬津水頭綠驃連錢雙驂騮日光射波脂膩浮  
青絲脫鞵黃金鉤輕爬短刷濕未收三花剪髮平且柔  
籬雲駿氣將無儔束芻斗豈馬羞茫茫豈草生林丘  
霜蹄胡為踏長楸振鬣一躍期天遊

十四日泊安陵



廣川六百里驛道上皇州紫極星辰近黃河日夜流村  
明溪夕火灘泊過年舟明發乘車去逢人說浪遊

和龔子敬先生遊春韻

烹茶熱旨酒坐石得嘉賓好鳥時鳴畫幽花不放春山  
遺今古事詩著往來人楚地龔夫子諸生數問津

贈黃竹村老儒畫梅竹

煙水盱江渺丹陽度雪寒久憐梅淡泊先問竹平安夜  
月清詩思春風彩筆端北來知己少歲暮欲彈冠

送張景亮知州致仕

角巾歸里舊儒冠  
宦轍馳驅涉萬端  
楊柳碧溪春晝永  
梅花白雪夜窗寒  
朝廷有道容辭老  
田野無羈得盡歡  
幸喜玉堂遺業在  
安居留待後人看

送劉德璋提點還宜興通真觀

通真僊觀欲凌虛  
北谷先生晝隱居  
玄鶴不歸警表柱  
白雲長護紫泥書  
桐棺已化人徒仰  
鐵鎖高懸孰可舒  
便欲束書陽羨路  
青牛春晚又迴車

遊梁溪暮歸

古樹呼風作雅音  
石梁溪渡景沈沈  
山橫宿靄曉晴薄  
人倚曲欄秋思深  
潁水空遺黃鵠恨  
茂陵多感白頭吟  
栖遲莫厭歸來晚  
明月驚烏繞故林

和王繼學治書

駒隙流光一鏡縣  
虛明直與綺窻連  
鑿開混沌知身外  
別有山川在眼前  
蓬島秋深稽漢使  
桃源春暖避秦仙  
敬亭山色看如畫  
熊枕圍屏穩畫眠

送趙李文任湖州錄判

萬里奉親官署近萱堂春早燕呢喃桃花紅似郎君馬  
楊柳青於從事衫茗水漁舟烟浩渺何山書舍石巉巖  
莫思杜牧尋芳晚剩有新詩寄一緘

題豫章山房

豫章林老色參天擁護山僧丈室前豈為法身同草木  
要驅塵慮出風烟茶甌香篆晨齋後竹几蒲團夜榻邊  
獨有瀏陽歐學士題詩遙問不空禪

和虞先生題當山張真人別業

嵐雨初晴綠樹新  
松蘿夾屋淨無塵  
洞花幽鳥時時別  
野鶴孤雲日日親  
紅霧半窻丹火候  
青山萬古百年人  
從君更覓方平宅  
玄武門前作近隣

紅葉題詩

金殿風微拾墜紅  
題詩聊寄玉溝東  
芳情有意隨流水  
細字無心學斷鴻  
別館乍涼霜透幕  
長門深夜月移宮  
才情偶爾成佳配  
不道周南有國風

出郭

步自東臯隔市塵青山高下欲迎人汀花有意開何晚  
野草無名亦自春

陶淵明歸去來圖

甲子題年玩物華門前栗里自桑麻從他晉史書劉宋  
別有黃花處士家

蘇天爵

字伯修真定人父志道歷官行省稱能吏天爵以  
國子生試名第一釋褐授大都路薊州判官調功

德使司照磨改國史院典籍陞應奉翰林文字進  
修撰擢江南行臺監察御史斷疑獄如神入為監  
察御史改奎章閣授經郎復拜御史在官四月知  
無不言自是內遷外擢皆顯官中忤時相罷歸久  
之上察其誣復使參知浙省大都路都總管兩浙  
都轉運使仍以江浙參知總兵饒信積勞得疾卒  
於軍中年五十九天爵為學博而知要長於紀載  
著國朝名臣事略十五卷文類七十卷詩文稿三  
卷

送同知任君玉西歸

薇花曾見照青春今日都門又送君  
入蜀使迎新太守  
渡瀘人識舊將軍  
琴聲彈落巴山月  
馬首披開劍閣雲

見說西州民事簡客來多誦長卿文

黃清老

字子肅邵武人泰定  
中進士官翰林供奉

福山菴

晨光海上來雲氣升萬壑雞鳴落花中殘鐘度城郭菴  
僧戴星出我自飯藜藿寧知天地心但有山水樂書燈  
夜搖動霧氣侵几閣開扉得新月欲掩見栖雀烟霞暫  
相違筆硯庶有託但留松間雪付與雙白鶴庭柯換故



葉林竹脫新籜何日芝草開拿舟付前約

送王君冕歸陝西

四首

麥熟天乍熱開軒理瑤琴茲辰有客至一徑蒼苔深日  
出樹影倒曠坐分綠陰清談落餘花松風雜幽禽君子  
希道德永言結同心

狂風捲茅屋遙見溪上山人生有遇合離別何足歎黃  
鵠將西歸臨風振羽翰我有雙明珠置之青雲端朝朝  
復暮暮照君千里還

少年處山谷壯歲遊京師性本猿鶴羣焉能牛馬馳曩  
有採薪憂桂冠願為醫近得聖賢對讀書甘如飴習慣  
已成癖豈無君子知

十載官京輦田園就荒蕪茲焉得歸耕休馬南山隅舉  
酒樹色動鶯燕鳴相呼流水既悅君白雲亦邀余錦囊  
可贈還愧非明月珠

送李子威代祀嵩衡淮海

二首

羣生望甘澤五岳雲氣通天香落巖谷瑞靄春冥濛海

潮天際來金碧森萬峰  
劃落紫翠堆亭亭玉芙蓉  
古廟絲竹存迎神奏黃鍾  
空山遞餘響落花舞青童

南海祝融宅汪洋載神州  
巨浸含萬有元氣何空浮  
蒼島嶼間彷彿通十洲  
神魚在深淵甘霖何以求朝折  
若木枝夕飲桐栢流萬里  
竟探討宣徒司馬遊

古樂府

二首

君好錦繡段妾好明月珠  
錦繡可為服服美令人愚  
不如珠夜光可以照讀書

君好春芍藥  
妾好夏池蓮  
芍藥多艷色  
春風迷少年  
不如蓮有實  
可以壽君筵

登平遠臺黿頂峰

六黿簸蕩玄圃碎  
三島崩騰失空翠  
海風掣斷南山雲  
分我滄江半江水  
臺南巖谷青  
岌岌奇松怪石作人立  
山巔恐有風雨來  
林徑空濛落花濕  
水東劣窮結平綠  
積霧飛嵐坐堪掬  
蓬萊迢迢幾萬里  
一碧天光浸寒玉  
吟翁回首看不足  
緩步策驢度空谷  
誰知咫尺山中幽

望斷殘暉立脩竹

天馬山

溪隨天馬西北行半空忽見蓮花生雙鸞欲下却飛去  
旌旗引入丹霞城攀蘿上到猿啼處恍然曠坐消百慮  
千山無人雲氣深終日徘徊不能去虛空樓閣時自開  
異香忽起三清臺風吹笑語落天半疑是神仙跨鶴來  
百花潭上春自照白鹿呼人猿亦嘯路迷不敢輕問津  
恐有賢人隱耕釣蒼崖九折樵徑通絕頂可見西崆峒

塵心豁然臂欲羽竦身直上凌天風

尋故人

適興一尋君君家在白雲寒花秋後見落葉夜深聞  
隨意坐苔石呼童煮澗芹不須談世事詩思正紛紛

貢闈偶成呈同院諸公

射宮園棘斷經過閒却秋聲太液波風定碧簾聞禁漏  
夜殘銀燭見星河仙人共對青藜杖詞客孤眠白玉坡  
弱水蓬萊三萬里不知何處月明多

雪夜直宿玉堂

琪樹花生禁漏遲  
金莖月色近書闈  
白雲入水春無跡  
銀漢橫空夜有輝  
竹靜似聞蒼玉佩  
松寒欲傍綠荷衣  
乾坤清氣蓬萊表  
獨坐天風拂翠微

張志道別都門

竹寺西軒共聽琴  
杏花猶記紫囊吟  
溪山老我扁舟興  
風雨知君萬里心  
滄海夜潮銀漢濕  
蓬萊春樹碧雲深  
三年離別樽前話  
傾倒何時更似今

庚午興聖殿進史

瑤編初進侍明光日麗龍池晝刻長堤柳染成春水色  
宮花併入御爐香金壺洒露層堦滑玉椀分冰廣殿涼  
勝睽似知天意喜鳳笙新奏五雲章

梧桐雨

曾將秋信報人知又與西風泣別離刻綠滴殘猶有淚  
題紅流去更無詩舊巢鳳冷朝飛遠古井金寒曉汲遲  
待得楚臺雲散後却憑琴調寄相思



題平翠樓

華樓突兀摩蒼天，清吟飛上神飄然。  
虛欄六曲飛雲起，蓮峰千仞當樽前。  
晴嵐帶霧結秋色，脩竹過雨鳴寒泉。  
東風一笑歌石鼓，心期試問金鰲仙。

友人擬古樂府因題絕句

四首

采苢歸來午花梢，日轉廊綠陰涼似水。  
不見洗紅妝，生愛東隣女。  
蛾眉畫不如，近來機杼廢。  
臨得右軍書，今夜中秋月。  
含情獨上樓，辰星三兩點。  
偏照玉簾鉤。

露井疎桐晚風亭碧藕秋捲簾山月上水宿見雙鷗

登福山遇僧偶出

鷲嶺雲深杖屨幽竹風松影共悠悠何人分得僧家榻  
坐看南山一片秋

友人見訪不過

君來白鶴下青冥我入春山聽曉鶯可惜小樓風雨過  
無人收拾萬松聲

貢師泰

字泰甫寧國宣城人文靖奎之子也少肄業國子  
泰定四年授太和州判官改歙縣丞擢應奉翰林  
文字出為紹興路總管府推官屢獻疑獄人稱為  
神再入翰林歷待制國子司業禮部郎中遷吏部  
拜監察御史陞吏部侍郎外任浙西庸田使江西  
廉訪副使召為禮部尚書參知江浙行省用戶部  
尚書分部閩中再以秘書卿召行至海寧得疾卒  
師泰以文字知名而於政事尤長所至輒效士譽  
翕然歸之  
有集行世

襍咏

四首

看月當看缺月缺終須圓賞花莫待開花開落還先靜  
觀萬物理可以全吾天東隣侈曼舞西隣沸繁絃歌燕

猶未終飄忽如浮烟宣尼陳蔡間伯夷首陽巔斯人雖  
已矣清風萬古傳

千金不為恩一語終感德所以古來士慷慨重相得  
茲義利間誰能有真識張儀復連衡鄢生空伏軾魯連  
不帝秦高論抗六國遂令千載下撫卷長歎息

疎林收霽靄方池含密陰坐深清晝冷餘花散鳴禽緘  
情何所寄撫我綠綺琴世無鍾子期誰能復知音

偃息北窻下好風從南來開窻延好風懷抱忽為開人

生如逆旅造花同嬰孩小知關蝸角營營真可哀是非  
何足論客至且銜杯

姑蘇

百花洲上姑蘇臺吳王宴時花正開半空畫燭西子醉  
三更鐵甲東門來吳波渺渺吳山簇不見嬌嚔倚欄曲  
丹楓落月怨啼烏碧草東風走驚鹿闔閭丘墓相連處  
應恨夫差迷不悟斷指千年血未乾遊魂夜哭臺前路

章華

靈王宗國崇臺宇按劍章華睨中土弁裳伏地走諸侯  
鐘鼓凌空震三楚騁驕不畏伍子謀落成乞與吳兵遊  
孤舟竟走江上路塊土獨占山中愁十年霸氣終蕭索  
回首華榮歸不得饑魂漂泊啼秋烟細腰却舞新王前

朝陽

神娥縹緲高唐上楚宮樓閣森相向丹楓蒼桂涌孤闕  
白石清江簇連嶂行雲冥冥飛雨寒孤猿咽咽秋花間  
翠鈿龍駕杳何處斷魂殘夢愁空山微臣宋玉誇能賦

當日襄王豈真遇千古秋風恨未平高泉飛落三巴怒

黃金

昭王銳志移青社築土縣金奉賢者四方劍佩集強燕  
千里風塵馳駿馬郭君自舉先聲豪傑生獨步超凡曹  
酬恩一雪霸國恥建功並倚雲天高君臣意氣千年少  
落日荒涼沒秋草黃金買貴滿長安悵惆英雄布衣老

戲馬

項王戲馬從東來意氣蹴踔全秦摧入關不並沛公轡

還鄉却上彭城臺重瞳按劍風雲靡萬足騰空烟霧起  
淒涼坡下泣名騅零落江邊餘數騎寄奴千載心爭雄  
登高把酒臨秋風詐移晉鼎非男子君看百戰東城死

銅雀

半空高柱翔金雀玉宸總帷塵漠漠西陵老樹暝色寒  
長安殘妓春情薄曲終紅袖辭尊前簷傾斷甃飛人間  
分香老淚恨不滅秋風吹入苔花斑漢家一片鄴城土  
肯為奸雄載歌舞銷盡曹瞞萬古魂落日漳河咽寒雨



送顧仲莊之海北

釣龍臺下與君別，萬里東南何日還。  
星斗動搖天在水，海門空闊浪如山。  
瓊玕寶樹來三島，鸚鵡金籠出百蠻。  
簫鼓船回應北上，鳳池春早佩珊珊。

送馬御史

萬斛龍驤海上回，除書忽報自天來。  
紅蓮日轉神仙幕，翠栢霜飛御史臺。  
已喜文章收俊譽，還因網紀得長材。  
風塵滿目難為別，且盡江頭酒一盃。

送洪元成赴靜江治中

海上東風吹鬢毛  
杏花開處雨蕭騷  
薦書舊最司徒考  
宮錦新裁別駕袍  
落日山城旌旆遠  
拍天春水柁樓高  
莫憐投老多辛苦  
萬里行囊有豹韜

題張子固所藏鮮于墨蹟

一自昭陵藏墨本  
書名誰復更超羣  
忽傳河朔專行草  
不讓吳興變隸分  
黃鵠夜深隨落月  
白鵝秋冷化孤雲  
風流賴有張公子  
雪繭封題比右軍

題李則平憲副所藏息齋竹

滿川風雨長簷簷吹作參差二鳳凰  
簪粉已翻鱗甲紫  
墨花還染羽毛蒼  
春寒弱幹當軒潤  
日暮清陰入酒涼  
便欲截筒鳴嶰谷  
却愁彈瑟望瀟湘

巴陵女子盧希孟貞節

尚書子婦魏王孫  
清白傳家節更貞  
諸將已捐南渡主  
孤身猶抗北來軍  
血書夜洒巴陵月  
烈氣秋橫鄂渚雲  
欲弔忠魂無覓處  
惟應瑤席從湘君

題淵明小像

竹杖芒鞋白鹿裘山中甲子幾春秋呼童檢點門前柳  
莫放花飛過石頭

柯九思

字敬仲天台人工詩善畫際遇文宗為奎章閣鑒  
書博士得出入內廷後失寵退居吳下元史無柯  
傳蓋未之考也

題誠夫尚書垂綸亭

尚書昔隱江漢間垂綸滄波弄白石千山桃葉起春謳

萬頃蘆花湧秋色適興偶拂珊瑚光豈意渭濱終得璜  
未央奏策動天子四海籍籍傳文章至今亭子松陰古  
磯上蒼苔長膏雨經綸事竟尋舊遊願逐茶烟渡湘浦

釣月軒

談笑從吾樂相過罷送迎凭欄看月出倚釣待雲生蝶  
化人間夢鷗尋海上盟軒車穩適意何物更關情

送陳玉林南還

龍去亭空思惘然道人和淚話當年珠宮錫號開三島

金榜承恩自九天  
花落御牀霑宿霧  
苔生輦路濕蒼烟  
春來怕渡秦淮水  
處處青林叫杜鵑

姚婁東往玉山因書以寄

相逢何事且徘徊  
澤國桃花岸岸開  
見說衡陽南去路  
秋深無雁寄書來

索陽莊瓜

穀雨初乾可自由  
荷鋤原上倦還休  
醉迷芳草生春夢  
誰識東陵是故侯

題畫白頭翁

春濃不放小禽棲  
白髮衝冠向曉啼  
簾幙半開人未起  
樓臺風暖日猶低

偶題寄玉山

谿行處處是仙家  
谷口逢君日未斜  
隔岸雲深相借問  
青松望極有桃花

偶成東匡廬山人

青鳥當時養得馴  
碧梧露下覆清晨  
紗幮忽見秋如許

應有蛾眉憶遠人

題李遵道畫扇

江清地僻野人家門外橋通石徑斜  
不信東華塵十丈  
萬山晴雪看梨花

題唐子華畫秋江才子圖

林臯霜老紅初冷  
蛩畔烟虛翠欲消  
記得山陰曾訪隱  
一筇秋色度溪橋

宇文公諒



字子貞其先成都人徙吳興公諒弱冠有操行館  
嘉興富家有夜奔者叱去之明日即辭歸不告以  
故登至順四年進士第授徽州路同知婺源事改  
餘姚遷高郵府惟官除國子助教調應奉翰林文  
字同知制誥兼國史院編修移病歸後歷國子監  
丞提舉江浙儒學廉訪嶺南以疾請老所著有以  
齋詩稿玉堂漫稿若干卷

### 送復見心往定水

定水招提鳴鶴東鑑湖歸去泛孤篷鉢衣不濕荷花露  
玉塵遙生桂子風山靜祇看雲自動江澄莫訝水如空  
沃州有約尋丈遁還許清談共野翁

西湖竹枝詞

斷霞灑灑魚尾紅清唱一聲湖月東  
阿儂只在繡簾裏  
隔著荷花無路通

台哈布哈

字兼善本巴約特氏初名塔布哈文宗為易斯名  
父塔布台歷仕台州錄事判官遂家於台布哈家  
貧好讀書集賢待制周仁榮養而教之年十七領  
江浙鄉試第一明年賜進士及第授集賢修撰轉  
秘監著作拜江南行臺御史擢中臺監察御史首  
劾托歡貪暴既抗章言文宗后加徽號及大臣列  
土封王為非制幾中危禍賴后悟得免自是屢任  
外職擢翰林侍讀學士兼修國史方國珍亂海上

以布哈稔知賊情遷浙東宣慰使都元帥分闡溫  
州至則國珍寇溫縱火筏焚之一夕遁去曾與左  
丞博羅約期進討博羅違約先三日出洋兵潰被  
執為國珍飾詞上聞布哈痛憤欲死朝廷莫由知  
之繼遣大司農達實等至黃巖招撫俱與布哈意  
見牴牾每值事會可圖軌縱之去更授以官國珍  
詭降而勢益熾布哈竟力  
戰死所著有復古編十卷

賦得上林鶯送張兵曹

春日陽闕道鶯聲滿上林來從金谷曉飛度玉樓陰柳  
嫩難分色歌停稍辨音明朝空解語人去落花深

春日次宋顯夫韻

帝城三月多春色南陌風光畫不如  
躑躅花深啼杜宇  
鷓鴣灘暖聚王餘玉樓似是秦宮宅  
金水元非鄭國渠  
處處笙歌移白日揚雄室讀五車書

汴梁懷古

雅勤呼集中已見  
此詩必有一誤

花石岡前麋鹿過中原秋色動關河  
欲詢故國傷心事  
忍聽前朝皓齒歌蔓草有風嘶石馬  
荆榛無月泣銅駝  
人間富貴皆如夢不獨興亡感慨多

京師上元夜

華月澄澄宿霧收萬家燈火見皇州天閣虎豹依霄漢  
人海魚龍混斗牛公子錦韉鳴玉勒內家珠箔控銀鈎  
道旁亦有揚雄宅寂寞芸窗冷似秋

寄姚子仲

懶趨青瑣立朝班焚却銀魚挂鐵冠琪樹有枝空集燕  
竹花無實謾栖鸞漢廷將相思王允晉代衣冠託謝安  
聖世只今多雨露上林芳草似琅玕

春日宣則門書事簡虞伯生

三月龍池柳色深碧梧烟煖日愔愔蜂粘落絮紫青幔  
燕逐飛花避綠沈仙仗曉開班玉筍雲韶春奏錫瓊林  
從臣盡獻河東賦獨有相如得賜金

寄同年宋吏部

金鏡承恩對紫薇錦韉白馬耀春暉謾隨仙仗朝天去  
不記宮花壓帽歸海國風高秋氣早關河雲冷雁聲稀  
嗟予已屬明時棄自整絲綸覓釣磯

送趙常伯淮西憲副

東華晨霧正霏霏  
使者分符向合肥  
封事尚留青鎖闥  
蒙恩近出紫宸闈  
江涵曉日明樓堞  
風引春雲上繡衣  
珍重故人千里別  
綠尊須盡莫相違

鞦韆詞

芙蓉宮額半塗黃  
雙送秋千出畫牆  
簾底燕驚花雨亂  
樹頭蜂繞襪塵香  
巧將新月添眉黛  
閒倩東風響珮璫  
歸去綠窻和困睡  
暫憑春夢到遼陽

送瓊州萬戶入京

海氣昏昏接蜃樓  
颶風吹浪蹴天浮  
旌旗畫捲蕉花落  
弓劍朝縣瘴雨收  
曾把烏號悲絕域  
却乘赤撥上神州  
男兒墜地四方志  
須及生封萬戶侯

絕句 二首

繡簾鉤月夜生涼  
花霧陰陰入畫堂  
吹徹玉簫人未寢  
更添新火試沈香

金吾列侍擁旌旄  
五色雲深雉尾高  
視草詞臣方退食  
內宮傳勅賜葡萄



送王奏差調福州

春水溶溶滿鑑湖  
蘭舟長護錦屠蘇  
可憐走馬閩山道  
榕葉陰中聽鷓鴣

庫庫

字子山喀喇氏祖雅克章事世祖從征有功庫庫幼肄業國學其學問得諸許衡長襲宿衞制行清潔始授集賢待制遷兵部郎中轉秘書監奉命往覈泉舶芥視珠犀不少留目改僉禮儀院拜監察御史遷秘書大監外歷江南行臺御史浙西廉訪使江浙行省平章政事內歷禮部尚書奎章閣學士大學士知經筵事翰林承旨知制詔兼修國史至正五年將用為平章政事感熱疾先卒年五十一

生平志在匡君濟時每侍經筵必娓娓教陳冀有  
感動常言宋徽宗多能惟一事不能順帝問何謂  
一事曰獨不能為  
君耳聞者避之

分賦清風嶺送達兼善總管紹興

清風嶺頭清風起佳人昔日沈江水一身義重鴻毛輕  
芳名千載清風裏會稽太守金閨英通籍當年第一名  
劇郡疲民應有望會將霖雨濟蒼生

宋元詩會卷八十二